

## Kuota pendidikan Melayu, Bumiputera ada dalam Perlembagaan

**Kuala Lumpur:** Sistem kuota untuk orang Melayu dan kaum Bumiputera dalam pendidikan adalah sebahagian daripada tindakan afirmatif negara yang dipertanggungjawabkan di bawah Perkara 153 Perlembagaan Persekutuan.

Felo Kanan Majlis Profesor Negara (MPN), Prof Emeritus Datuk Dr Teo Kok Seong, berkata tindakan afirmatif ini juga wujud di banyak negara dan ia penting bagi memastikan demografi sesebuah negara itu diwakili pada segenap peringkat.

Kok Seong berkata, Malaysia yang tidak terkecuali didapati melaksanakannya dengan adil, yakni tidak sesekali menyetepikan peluang kelompok bukan Melayu

dan Bumiputera, antaranya dapat dilihat kepada pelbagai pilihan yang tersedia dalam bidang pendidikan negara untuk anak bangsa memajukan diri, termasuk Skim Pinjaman Pendidikan Perbadanan Tabung Pendidikan Tinggi Nasional (PTPTN).

"Sistem kuota dalam bidang pendidikan dan lain-lain ini sebenarnya adalah tindakan positif. Selain dapat membantu kelompok yang ketinggalan, ia juga adalah pemangkin kepada perpaduan negara dan integrasi nasional.

"Ini berlaku selepas defisit sosial, khususnya pada jurang antara etnisiti, kelas sosial dan kawasan bandar-luar bandar, dirapatkan melalui tindakan afir-

matif negara, khususnya menerusi sistem kuota," kata Kok Seong yang juga Felo Kehormat Institut Masa Depan Negara (MASA), ketika dihubungi BERNAMA.

Beliau berkata, tindakan afirmatif di bawah Perkara 153 Perlembagaan Persekutuan itu boleh diketakan jaminan tetap kepada etnik Melayu dan kaum Bumiputera dalam bidang pendidikan negara bahawa mereka mempunyai kedudukan istimewa, antaranya melalui sistem kuota ini.



Teo Kok Seong

"Sebagai antara bahagian penting dalam tindakan afirmatif negara, kuota Melayu dan Bumiputera itu adalah dasar bagi memastikan pembabitan pelajar dua kelompok ini yang didapati ketinggalan dalam bidang pendidikan berbanding pelajar daripada etnik lain, tetap ada untuk mereka memperbaiki diri, agar tidak

terus ketinggalan," katanya. Beliau berkata, peluang terbahagi perlu digunakan dengan baik oleh golongan berkenaan dan perlu dimanfaatkan untuk terus berjaya dalam kerjaya se-

bagai profesional, antaranya untuk menolak tanggapan kuota Melayu dan Bumiputera itu tidak boleh menghasilkan pelajar dan profesional cemerlang.

Semalam, Perdana Menteri, Datuk Seri Anwar Ibrahim, semasa program Temu Anwar Kedah di Universiti Utara Malaysia (UUM) berkata sistem kuota Melayu dan Bumiputera dalam pendidikan perlu dikekalkan bagi mengimbangi jumlah pelajar kaum itu di institusi pengajian tinggi (IPT).

Anwar berkata, jika sistem itu tidak dikekalkan, ia boleh menyebabkan ketidakseimbangan atau 'tempang' jumlah pelajar Melayu di IPT termasuk dalam jurusan tertentu. BERNAMA